



Seksyen 2
**Dasar dan Program
Pembangunan PKS**

Bab
LIMA

**Program
Pembangunan**
PKS dan Keusahawanan
pada Tahun 2019

Program Pembangunan PKS dan Keusahawanan pada Tahun 2019



Kepentingan sektor PKS dicerminkan menerusi peruntukan kewangan yang besar yang disediakan oleh Kerajaan untuk memacu pertumbuhannya. Pada tahun 2019, peruntukan sebanyak RM13.7 bilion telah disediakan untuk program pembangunan PKS dalam enam bidang tumpuan, iaitu akses kepada pembiayaan, pembangunan modal insan, akses kepada pasaran, penerapan teknologi dan inovasi, infrastruktur dan persekitaran perundungan dan pengawalseliaan. Program-program yang dilaksanakan oleh 17 kementerian dan 60 agensi, direka untuk memberi insentif kepada pertumbuhan sektor ini serta memastikan pembangunan yang mampan dan inklusif dengan meningkatkan sumbangan perusahaan mikro dan kumpulan B40 kepada ekonomi.

Salah satu fokus utama bagi tahun ini adalah untuk mempercepat kewujudan syarikat pertumbuhan tinggi dan berinovatif. Subsektor utama yang dikenal pasti ialah industri rel, peranti perubatan, aeroangkasa, automotif, ekonomi digital, bioteknologi dan tenaga boleh diperbaharui. Penekanan diberikan kepada pengeluar dan penyedia perkhidmatan dalam aktiviti ekonomi sedemikian yang mempunyai potensi dan keupayaan lebih besar untuk mempelbagaikan produk dan perkhidmatan mereka ke arah projek yang lebih

kompleks dan bernilai tinggi. Seterusnya, terdapat langkah-langkah yang diperkenalkan untuk memacu sumbangan ekonomi yang lebih besar oleh PKS termasuk memperhebat digitalisasi dan meningkatkan integrasi PKS dalam rantaian bekalan; memudahkan mekanisme pembiayaan alternatif; meningkatkan penyertaan PKS dalam rantaian industri pelancongan; melaksanakan langkah-langkah untuk memacu pertumbuhan dan memperkuat pengambilan; serta mempromosikan eksport bagi saluran pembayaran dan teknologi kewangan (*fintech*) milikan tempatan.


Sejumlah 164 program pembangunan PKS yang disokong oleh komitmen kewangan sebanyak RM13.7 bilion sedang dilaksanakan pada tahun 2019. Dengan sasaran untuk memberi manfaat kepada sejumlah 555,408 benefisiari, program ini telah dirancang merentasi bidang tumpuan yang dianggap kritikal untuk pembangunan mampan bagi sektor PKS iaitu akses kepada pembiayaan, pembangunan modal insan, penerapan teknologi dan inovasi, akses kepada pasaran, infrastruktur serta persekitaran perundangan dan pengawalseliaan.

Daripada jumlah komitmen kewangan, 96.1% (RM13.2 bilion), telah diperuntukkan untuk melaksanakan 33 program akses kepada pembiayaan untuk 434,502 benefisiari. Peruntukan kedua terbesar sebanyak RM192.1 juta adalah untuk 53 program pembangunan modal insan untuk 103,684 benefisiari manakala komitmen sebanyak RM148.0 juta diperuntukkan untuk melaksanakan 28 program penerapan teknologi dan inovasi untuk 5,613 benefisiari. Sebanyak 34 program akses kepada pasaran dengan peruntukan sejumlah RM124.4 juta untuk 10,191 benefisiari berada dalam perancangan manakala 15 program infrastruktur untuk 1,418 benefisiari akan dilaksanakan dan dibiayai daripada peruntukan sebanyak RM44.0 juta. Satu program persekitaran perundangan dan pengawalseliaan dengan peruntukan sebanyak RM20.0 juga telah dirancang untuk tahun 2019.


Jadual 5.1: Program Pembangunan PKS pada Tahun 2019 mengikut Bidang Tumpuan

Bidang Tumpuan	Bilangan Program	Komitmen Kewangan (RM Juta)	Jumlah Benefisiari (Sasaran)
Akses kepada Pembiayaan	33	13,172.9	434,502
Pembangunan Modal Insan	53	192.1	103,684
Penerapan Teknologi dan Inovasi	28	148.0	5,613
Akses kepada Pasaran	34	124.4	10,191
Infrastruktur	15	44.0	1,418
Persekutuan Perundangan dan Pengawalseliaan	1	20.0	-
Jumlah	164	13,701.4	555,408

Carta 5.1: Program mengikut Bidang Tumpuan (%)



Carta 5.2: Komitmen Kewangan mengikut Bidang Tumpuan (%)



PEMBANGUNAN MODAL INSAN

Memastikan pertumbuhan perniagaan yang mampan memerlukan kemahiran yang luas untuk mengemudi menerusi kerumitan ekonomi pada hari ini. Menyedari hakikat bahawa perkara ini mungkin amat mencabar bagi PKS dan usahawan, komitmen kewangan sebanyak RM192.1 juta telah diperuntukkan untuk melaksanakan 53 program pembangunan modal insan. Bilangan sasaran beneficiari telah ditetapkan pada 103,684. Program-program yang dirancang untuk tahun 2019 termasuk:

- **Sistem Latihan Dual Nasional** menyediakan latihan untuk lepasan sekolah dan penganggur yang berfungsi sebagai saluran untuk memenuhi permintaan guna tenaga daripada PKS serta menyediakan peningkatan kemahiran pekerja sedia ada dan baharu. Program ini dijalankan oleh Jabatan Pembangunan Kemahiran, Kementerian Sumber Manusia. Pada tahun 2019, RM45.0 juta telah diperuntukkan untuk melaksanakan program yang akan memberi manfaat kepada 400 beneficiari.
- **Program Pembangunan Usahawan**, yang diterajui oleh MARA, menyasarkan untuk mewujudkan 77,200 usahawan Bumiputera dalam tempoh lima tahun dari 2016 hingga 2020. Sejumlah RM31.0 juta telah diperuntukkan untuk membayai program yang menyasarkan untuk membantu 15,546 beneficiari.
- **Program Mudahcara Pensijilan Halal** memudahkan kesediaan pematuhan dan pensijilan halal untuk PKS. Program ini diterajui oleh Perbadanan Pembangunan Industri Halal dengan kerjasama kementerian dan agensi Kerajaan lain. Pada tahun 2019, RM0.6 juta telah diperuntukkan untuk membantu 250 beneficiari.



- **Program Transformasi Bengkel (Workshop Transformation Programme, WTP)** bertujuan membantu bengkel automotif di negara ini untuk meningkatkan daya saing dan keuntungan menerusi penambahbaikan tahap kepuasan pelanggan dan jumlah jualan. Program yang diterajui oleh Institut Automotif, Robotik dan IoT Malaysia (MARii) telah diberi peruntukan sebanyak RM3.7 juta bagi sasaran sebanyak 1,000 beneficiari pada tahun 2019.
- Program **Aktiviti Ekonomi Tambahan** yang diterajui oleh Pihak Berkuasa Kemajuan Pekebun Kecil Perusahaan Getah (RISDA), direka untuk membantu pekebun kecil untuk mengoptimumkan sumber dan memaksimumkan pendapatan dengan menjalankan aktiviti ekonomi tambahan lain. Program ini menyediakan bantuan dalam bentuk jentera, peralatan, bahan mentah atau sumber lain yang diperlukan untuk menjalankan aktiviti yang telah dikenal pasti. Sebanyak RM15.0 juta telah diperuntukkan untuk membantu 1,500 orang pekebun kecil.

PENERAPAN TEKNOLOGI DAN INOVASI

Program penerapan teknologi dan inovasi penting untuk membantu PKS dalam meningkatkan produktiviti, memacu kecekapan dan memangkin pertumbuhan. Selain itu, penting bagi Kerajaan untuk membuat penilaian jurang dan memudahkan kesediaan PKS untuk menghadapi cabaran yang timbul daripada Revolusi Perindustrian Keempat (*Industrial Revolution 4.0, IR 4.0*). Digitalisasi merupakan kunci bagi PKS untuk berkembang dan berinovasi sejajar dengan keperluan IR 4.0. dan mewujudkan pekerjaan pada masa hadapan. Berikutnya ini, 28 program penerapan teknologi dan inovasi yang disokong oleh komitmen kewangan sebanyak RM148.0 juta dilaksanakan pada tahun 2019. Program ini memberi manfaat kepada 5,613 peserta. Program-program untuk tahun 2019 termasuk:

- Institut Penyelidikan dan Kemajuan Pertanian Malaysia (MARDI) menyediakan **khidmat nasihat, analisis produk, klinik, seminar** dan **latihan penempatan** bagi usahawan yang sedia ada dan beraspirasi dengan peruntukan RM0.5 juta untuk melaksanakan program dengan 3,770 beneficiari. Program ini termasuk menawarkan nasihat teknikal kepada sasaran 3,000 usahawan sedia ada dan yang beraspirasi, mengadakan seminar teknologi dan bengkel untuk 600 usahawan, menjalankan penilaian kualiti produk, lawatan teknikal dan pemantauan berkala terhadap prestasi usahawan yang terlibat. Program ini juga bertujuan untuk mewujudkan 50 usahawan PKS dan usahawan mikro berdasarkan teknologi dan membantu menyelesaikan masalah teknikal di tapak penempatan untuk sasaran berjumlah 120 usahawan.
- Institut Automotif, Robotik dan IoT Malaysia (MARii) menerajui pengenalan **4R2S** (Pembaikan, Penggunaan Semula, Kitar Semula, Pembuatan semula, Perkhidmatan, Alat Ganti) iaitu sistem pengurusan yang akan diguna pakai oleh perniagaan sedia ada dan baharu dalam sektor automotif selepas jualan. MARii telah diberikan peruntukan sebanyak RM0.2 juta untuk membantu 100 peserta melaksanakan sistem ini.



Digitalisasi merupakan kunci bagi PKS untuk berkembang dan berinovasi sejajar dengan keperluan IR 4.0. dan mewujudkan pekerjaan pada masa hadapan.

- Program **Peningkatan Enterpis Bumiputera (Bumiputera Enterprise Enhancement Programme, BEEP)**, yang diterajui oleh SME Corp. Malaysia bertujuan untuk membangunkan PKS Bumiputera dengan menyediakan pakej bantuan menyeluruh yang merangkumi bantuan kewangan dan khidmat nasihat. Pada tahun 2019, RM3.0 juta telah diperuntukkan untuk melaksanakan program ini bagi 120 benefisiari.
- Pelaksanaan **Aktiviti Teras yang Disasarkan untuk Meningkatkan Produktiviti dan Pengembangan Pasaran PKS dengan Kolaborasi SIRIM-Fraunhofer** melibatkan pelaksanaan aktiviti teras untuk meningkatkan produktiviti dan pengembangan pasaran, seperti pengurusan inovasi menerusi audit teknologi (analisis rantaian nilai) dan meningkatkan penerapan teknologi. Pada tahun 2019, RM3.8 juta telah diperuntukkan untuk melaksanakan program ini bagi 150 benefisiari.
- **Sistem Teknologi Pintar MAI (MITS)** yang diterajui oleh MARii menyediakan pengalaman pengkomputeran i-Cloud automotif dan 3D untuk meningkatkan vendor tempatan sedia ada kepada pensijilan Tahap 4. Peruntukan sebanyak RM3.5 juta telah diperuntukkan untuk mengendalikan program ini bagi 450 benefisiari.

AKSES KEPADA PASARAN

Dalam pasaran yang semakin kompetitif, PKS perlu konsisten merangka strategi perniagaan baharu untuk berdaya saing di peringkat global. Strategi baharu akan menggariskan langkah-langkah untuk menambah baik piawaian dan pensijilan, menjalankan penyelidikan pasaran yang bertujuan untuk mendapatkan maklumat selok-belok pasaran asing, penyesuaian produk dan orientasi perkhidmatan serta mengenal pasti teroka secara usaha sama, sambil memanfaatkan kehadiran teknologi untuk meluaskan potensi pasaran, meningkatkan jualan dan interaksi secara efektif dengan pelanggan dan firma lain. Walaupun bagi PKS berorientasikan perkhidmatan yang lebih menumpu kepada pasaran tempatan, penyesuaian yang seiring dengan tahap global akan membantu mereka dalam jangka masa panjang untuk terus berdaya saing kerana pelanggan akan sentiasa mencari kualiti yang lebih baik pada harga yang lebih murah dan penghantaran yang lebih cekap. Sebanyak 34 program akses kepada pasaran dengan peruntukan sebanyak RM124.4 juta untuk 10,191 beneficiari dilaksanakan pada tahun 2019. Program-program ini termasuk:

- MATRADE menerajui **Program eTRADE** yang memberi sokongan kepada PKS untuk mengambil bahagian dalam e-pasaran antarabangsa terkemuka. Sejumlah RM4.0 juta telah diperuntukkan untuk membantu 600 beneficiari pada tahun 2019.
- Satu lagi program oleh MATRADE ialah **Geran Pembangunan Pasaran (Market Development Grant, MDG)** bertujuan memberi bantuan kepada PKS, penyedia perkhidmatan, persatuan perdagangan dan badan profesional untuk menjalankan aktiviti bagi membangunkan pasaran eksport. Pada tahun 2019, RM30.0 juta telah diperuntukkan untuk membantu 1,500 beneficiari.
- **Program Peningkatan Produk dan Kualiti menerusi Transformasi Biz, Kualiti Biz, Program INNOPACK dan Program Pek Hijau** yang diterajui oleh SIRIM, bertujuan untuk memupuk dan meningkatkan usahawan mikro Bumiputera ke tahap PKS dan akhirnya menjadi syarikat yang bersedia untuk mengeksport. Pada tahun 2019, RM5.0 juta telah diperuntukkan bagi melaksanakan program ini untuk 250 beneficiari.
- Program **Promosi Pasaran Tempatan dan Antarabangsa** yang diterajui oleh Lembaga Perindustrian Kayu Malaysia bertujuan untuk meningkatkan jualan produk dan perkhidmatan PKS dalam pasaran domestik dan antarabangsa. Pada tahun 2019, RM3.0 juta telah diperuntukkan untuk program ini dengan jumlah sasaran 20,295 beneficiari.
- Pameran **Satu Daerah Satu Industri (SDSI)** yang diterajui oleh Bahagian Usahawan Bumiputera, Kementerian Pembangunan Usahawan, memudahkan perolehan sumber dan pemasaran produk dan perkhidmatan yang berkualiti tinggi, meningkatkan rangkaian dalam kalangan usahawan SDSI serta mewujudkan usahasama perniagaan baharu dan antara peniaga tempatan dan antarabangsa. Pada tahun 2019, RM3.5 juta telah diperuntukkan untuk membiayai program ini untuk 400 beneficiari.

- Program **Latihan Kualiti dan Keselamatan untuk Pemasar** yang diterajui oleh Lembaga Pemasaran Pertanian Persekutuan (FAMA) direka untuk melatih para peserta dalam pemasaran teknologi dan amalan pasca penuaian serta mewujudkan peraturan dan piawaian untuk keselamatan dan kualiti produk untuk pematuhan undang-undang perdagangan antarabangsa. FAMA memperuntuk RM1.4 juta pada tahun 2019 untuk melatih sebanyak 2,680 beneficiari yang disasarkan.

INFRASTRUKTUR

Kepentingan infrastruktur dalam proses pertumbuhan ekonomi telah disedari sejak sekian lama. Walaupun keperluannya adalah untuk penubuhan perniagaan dan kelangsungan hidup, kos mendapatkan infrastruktur dan kemudahan yang berintegrasi dengan baik dan terletak secara strategik adalah lebih mencabar bagi PKS, lantas memerlukan intervensi spesifik oleh Kerajaan. Oleh itu, pada tahun 2019, sebanyak 15 program infrastruktur dengan komitmen kewangan sebanyak RM44.0 juta telah dirancang untuk membantu sejumlah 1,418 beneficiari. Program-program ini termasuk:

- Program **Pembangunan Estet Perindustrian** yang berpusat di Estet Perindustrian Sibu, direka untuk menyediakan kemudahan dan infrastruktur yang lebih baik menerusi pembangunan yang bersesuaian untuk estet perindustrian. Program ini juga bertujuan untuk mempromosikan pertumbuhan PKS secara teratur serta mewujudkan lebih banyak aktiviti ekonomi. Pada tahun 2019, peruntukan sebanyak RM11.0 juta telah disediakan untuk projek yang menyasarkan sebanyak 55 beneficiari. Kementerian Pembangunan Perindustrian dan Usahawan Sarawak mempelopori projek ini yang dijadualkan siap pada tahun 2020.
- Projek **Kampung Usahawan Air Panas Machang dengan Kemudahan Gaya Kontena** melibatkan penambahbaikan kemudahan di kolam air panas Machang menggunakan kontena perkapalan yang telah diubahsuai disediakan kepada usahawan mikro untuk digunakan sebagai premis perniagaan. Projek ini dengan peruntukan sebanyak RM1.0 juta dilaksanakan oleh Perbadanan Kemajuan Negeri Kelantan.
- Program **Menaiktaraf Premis** bertujuan untuk memastikan para usahawan mempunyai premis yang bukan sahaja kondusif untuk aktiviti perniagaan mereka tetapi juga memudahkan proses persijilan. Projek dengan peruntukan RM30,000 ini dilaksanakan oleh Pihak Berkuasa Pembangunan Serantau Pulau Pinang.



- Projek **Pembinaan Bengkel Perindustrian di Sg Namek, Sik** melibatkan pembinaan tujuh bengkel dan bangunan perindustrian bagi usahawan luar bandar di Sg Namek, Sik, Kedah. Pada tahun 2019, peruntukan sebanyak RM1.0 juta disediakan untuk program ini yang diterajui oleh Pihak Berkuasa Pembangunan Wilayah Kedah (KEDA).
- Projek **Taman IKS KEDA**, yang diterajui oleh KEDA, melibatkan pembinaan 28 bengkel dan bangunan perindustrian lain untuk usahawan luar bandar. Dana sebanyak RM1.7 juta telah diperuntukkan untuk projek ini pada tahun 2019.
- Jabatan Kemajuan Orang Asli menyediakan premis perniagaan untuk usahawan Orang Asli menerusi program **Pembangunan Premis Perniagaan**. Peruntukan sebanyak RM0.3 juta telah disediakan untuk membantu lima benefisiari.
- Program **Kios di Masjid Sultan Ahmad** melibatkan pembinaan enam kios untuk usahawan menjalankan perniagaan di Masjid Sultan Ahmad (Masjid Keputeraan) di Paloh 2, Gua Musang. Perbadanan Kemajuan Iktisad Negeri Kelantan dengan peruntukan sebanyak RM0.2 juta menyediakan kemudahan untuk usahawan baharu serta membantu menjana pendapatan bagi pengurusan masjid menerusi penyewaan kios.

PERSEKITARAN PERUNDANGAN DAN PENGAWALSELIAAN

HIP 1: Integrasi Pendaftaran dan Pelesenan Perniagaan merupakan satu-satunya program yang sedang dilaksanakan di bawah tumpuan persekitaran perundangan dan pengawalseliaan. Di bawah HIP 1, satu gerbang diwujudkan untuk pendaftaran dan pelesenan perniagaan bagi menggalakkan dan memudahkan pemformalan perniagaan. Peruntukan sebanyak RM20.0 juta telah diberikan untuk program ini pada tahun 2019 yang diterajui oleh MAMPU dengan kerjasama SME Corp. Malaysia.